

Na osnovu člana 17. Statuta Općine Doboj Istok («Službene novine općine Doboj Istok» , broj 05/08) i člana 40. Poslovnika o radu Općinskog vijeća Doboj Istok («Službene novine općine Doboj Istok» , broj 07/09), Općinsko vijeće Doboj Istok na svojoj 22. redovnoj sjednici održanoj dana 28.10.2010. godine , usvojilo je

K O D E K S

ponašanja izabranih zvaničnika – vijećnika u Općinskom vijeću Doboj Istok

I - OPĆE ODREDBE

Član 1.

Ovim Kodeksom utvrđuju se i promovišu etički principi i standardi ponašanja i rada izabranih zvaničnika – vijećnika Općinskog vijeća Doboj Istok (u daljem tekstu: vijećnici) u cilju kvalitetnog ostvarivanja mandata u interesu svih građana Općine.

Vijećnici svoja prava, dužnosti i odgovornosti ostvaruju u skladu sa Zakonom, Statutom, Poslovníkom o radu Općinskog vijeća i ovim Kodeksom.

Član 2.

Vijećnici Općinskog vijeća Doboj Istok, kao neposredno izabrani predstavnici građana Općine Doboj Istok, uzajamno se obavezuju na poštivanje ovog Kodeksa, a sve u cilju opravdanja i jačanja javnog povjerenja, ličnog i političkog integriteta i autoriteta koji pripada Općinskom vijeću Doboj Istok i njima kao njenom sastavnom dijelu.

II - PODRUČJE PRIMJENE

Član 3.

Ovaj Kodeks se odnosi na vijećnike Općinskog vijeća Doboj Istok (u daljem tekstu: Vijeće) kao izabrane predstavnike građana na neposrednim i tajnim izborima. Principi ponašanja ustanovljeni ovim Kodeksom primjenjivat će se i u izbornoj kampanji.

Vijećnici u Vijeću će uvijek težiti izgradnji kriterija u odlučivanju, vodit će ravnomjernu brigu za sve mjesne sredine i građane, bez obzira na sredinu iz koje dolaze.

III - PRINCIPI PONAŠANJA

1. Definisanje principa i standarda rada u obavljanju funkcije

Član 4.

Vijećnici su obavezni u obavljanju svojih dužnosti u Vijeću i prema javnosti u cjelini, pridržavati se sljedećih principa i standarda:

1. **prioritet zakona i općeg interesa,**
2. **integritet,**
3. **nesebičnost,**
4. **zabrana mita i korupcije,**
5. **otvorenost i odnosi sa medijima,**
6. **odgovornost,**
7. **izbjegavanje sukoba interesa,**
8. **pravilno upravljanje resursima,**
9. **profesionalno usavršavanje,**
10. **uzajamno poštovanje i uvažavanje.**

Prioritet zakona i općeg interesa

Član 5.

U svom cjelokupnom djelovanju vijećnici će uvijek poštivati prioritet primjene zakona i općeg interesa i svoje aktivnosti će usmjeriti i djelovati u ostavarivanju javnog interesa.

Vijećnici će u svom djelovanju uvijek imati na umu da su izabrani predstavnici svih građana u općini Doboj Istok, a ne nekog njegovog dijela ili stranke.

U svom djelovanju uvijek će se truditi da svoje odluke i prijedloge donose isključivo u okviru propisa i po procedurama koje su predviđene propisima.

Nijednu svoju odluku neće donijeti niti će glasati, niti prećutati da javno iznesu svoj stav, ukoliko im je poznato da određeni akt koji treba da se donese nije u skladu sa propisima ili da nije poštovana procedura njegovog donošenja.

Vijećnici u Vijeću imaju zajednički interes raditi na najboljim rješenjima za sve građane općine Doboj Istok, u okviru nadležnosti, ovlaštenja i odgovornosti, koje općine, kao jedinice lokalne samouprave imaju prema zakonu.

Integritet

Član 6.

U svom djelovanju vijećnici će, prema svojim znanjima i sposobnostima, uvijek samostalno donositi svoje odluke za koje su odgovorni, uvijek imajući u vidu najbolje interese svih građana i neće dozvoliti spoljni uticaj na ispoljavanje njihove volje prilikom raspravljanja i odlučivanja po pojedinim pitanjima iz nadležnosti Vijeća ili radnog tijela Vijeća.

Vijećnici će djelovati nezavisno od neprincipijelnih uticaja ili pritisaka od izvršnih organa općine ili općinske administracije u pogledu načina glasanja ili zauzimanja stavova o pojedinim pitanjima iz nadležnosti Vijeća ili radnog tijela Vijeća.

Nesebičnost

Član 7.

Poštujući utvrđeno pravilo da mandat pripada vijećniku a ne političkoj stranci, koaliciji ili listi nezavisnih kandidata sa čije je liste izabran, vijećnici će postupati u skladu sa općim interesima koji isključuju rad za finansijsku dobit ili bilo koju drugu direktnu ili indirektnu korist za sebe ili lica iz svog privatnog okruženja, izuzev naknada i nagrada utvrđenih aktima Vijeća ili drugog nadležnog organa.

Zabrana mita i korupcije

Član 8.

U obavljanju svojih funkcija vijećnici ne smiju primati ili davati neku naknadu, niti smiju obećavati nekome nagradu ili kakvu drugu korist. Vijećnici svoje funkcije vrše isključivo u javnom interesu, zanemarujući u potpunosti nagrade koje bi dobio u slučaju postupanja suprotnog općem dobru i javnom interesu.

Vijećnici ne smiju zloupotrebjavati svoj položaj kako bi omogućio bilo kakvu beneficiju u svoju korist ili korist svoje porodice.

Ovaj princip odnosi se i na svako drugo ponašanje koje bi se prema važećim propisim moglo podvesti kao aktivno ili pasivno podmićivanje.

Otvorenost i odnosi sa medijima

Član 9.

Vijećnici će u svom djelovanju i u vezi sa odlukama koje donose uvijek biti otvoreni i nijednom svojom aktivnošću neće izbjegavati da jasno i javno saopšte i obrazlože svoje stavove i razloge za sopstvene odluke i ponašanja.

Vijećnici su spremni iznositi svoja različita početna stajališta, kao izraz kolegijalnog neslaganja, utemeljena na međusobnom uvažavanju s krajnjim ciljem približavanja različitih stajališta na osnovu iznesenih činjenica.

Prema zahtjevima medija će pošteno i u potpunosti pružati informacije vezane za obavljanje njihovih dužnosti i neće direktno pružati ni jednu povjerljivu informaciju ili informaciju koja se tiče privatnog života vijećnika ili trećih lica.

Odgovornost

Član 10.

Vijećnici su odgovorni za zakonitost rada Vijeća, što podrazumijeva odlučivanje u skladu sa zakonskim propisima, primjenu i poštivanje propisanih procedura, djelovanja u skladu sa principima dobre uprave, efikasan, efektivan i ekonomičan rad Vijeća, nepristrasnost u odlučivanju, koja isključuje bilo kakav vid diskriminacije, političkog pripadanja i nepotizma, kao i javnost svog djelovanja.

Vijećnici su odgovorni za kreiranje i ostvarivanje politike javnih usluga i njihovo djelovanje uskladjeno sa principima demokratije, časti i poštenja.

Odgovornost svakog vijećnika je individualna.

Izbjegavanje sukoba interesa

Član 11.

Vijećnici se trebaju ponašati savjesno i odgovorno, da ne ugrožavaju povjerenje i pouzdanje građana, te da poštuju zakone i druge propise kojima se određuju prava, obaveze i odgovornosti u obavljanju javnih dužnosti.

Vijećnici će se u svakom slučaju pridržavati odredbi Zakona o sukobu interesa u institucijama vlasti Bosne i Hercegovine i drugih zakona koji uređuju nespojivost funkcije vijećnika sa funkcijom i položajem u lokalnoj upravi, državnom organu ili preduzećima. U svim slučajevima nastupanja sukoba interesa ili nespojivosti funkcija, vijećnik će u najkraćem roku prijaviti takav slučaj i odstupiti sa pozicije vijećnika.

Vijećnici će u svakom slučaju tokom rasprave prijaviti slučaj sukoba interesa, ako se razmatra određeni akt koji treba da bude usvojen i po kom bi on ili njegovi srodnici i prijatelji ili pravni subjekt u kome ima finansijski ili drugi interes, trebalo da ostvari kakvu korist ili privilegiju i prilikom odlučivanja će se izuzeti od izjašnjavanja.

Vijećnici će se uredno pridržavati zahtjeva za prijavu podataka ili davanje informacija o funkcijama koje zauzima, zanimanju i promjenama u njegovoj imovini.

Upravljanje resursima

Član 12.

Vijećnici će sa najvećom pažnjom i osjećajem sopstvene odgovornosti usmjeravati svoje ponašanje i odluke koje se odnose na finansijska sredstva i upravljanje imovinom Općine, isključivo u skladu sa propisima i općim interesom. Svojim ponašanjem neće dati povoda, niti aktivno ili pasivno učestvovati u pripremanju ili podsticati donošenje nepravilnih odluka, koje bi mogle donijeti lične koristi ili ostvarenja nečijeg privatnog interesa sa kojima su povezani finansijskim ili nekim drugim interesom.

Vijećnici će se uzdržavati od svih akcija koje bi trebalo da rezultiraju izborom, imenovanjem ili postavljenjem lica na određene pozicije, a da se pri tome ne provode propisi, ne obezbijedi postupak otvorene javne konkurencije, nezavisne provjere i poštovanja principa kvaliteta, profesionalnosti, znanja, stručnosti i sposobnosti.

Profesionalno usavršavanje

Član 13.

U cilju što uspješnijeg obavljanja povjerenih dužnosti, vijećnici će se kako samostalnim aktivnostima tako i prisustvujući seminarima, savjetovanjima i drugim oblicima edukacije, obogaćivati i usavršavati svoja znanja i sposobnosti.

Uzajamno poštovanje i uvažavanje

Član 14.

Od presudne važnosti je spremnost svih vijećnika da se otvoreno razgovara i iskreno u međusobnim odnosima, nenapadački i neodbranački, bez podilaženja izvršnoj vlasti, uz samopoštovanje i dostojanstvo, ali i poštivanje i dostojanstvo drugih.

U međusobnoj komunikaciji i uopće sa javnošću, vijećnici će u svakom slučaju istupati sa uvažavanjem i poštivanjem, njegovati kulturu dijaloga, izbjegavajući korištenje izraza koji mogu vrijeđati ili omaložavati druge ličnosti ili grupe, na taj način poštujući jednaka prava svih na uvažavanje njihove ličnosti i uvjerenja.

Poštujući obaveze vijećnika da su dužni prisustvovati sjednicama Vijeća i tijela čiji su članovi, a uvažavajući jedni druge, neće napuštati sjednicu prije završetka, a ni tokom trajanja, a da prije toga ne saopće javno ili predsjedavajućem, razlog povremenog ili potpunog napuštanja sjednice. Ako su opravdanim razlogom spriječeni da prisustvuju sastanicima ili sjednicama na koje su uredno i blagovremeno pozvani, predsjedavajućem će saopštiti te razloge, a on će Vijeće ili radno tijelo Vijeća obavijestiti o razlogu izostanka pozvanog vijećnika.

Vijećnici će nastojati kada su u mogućnosti prisustvovati javnim manifestacijama ili javnim skupovima na koje su uredno i blagovremeno pozvani u svojstvu vijećnika.

IV - SVEČANA IZJAVA

Član 15.

Vijećnici prilikom preuzimanja dužnosti daju svečanu izjavu kako je to predviđeno Poslovníkom i potpisuće posebnu izjavu o prihvatanju i obavezi poštivanja i primjene Kodeksa.

V - PRAĆENJE PRIMJENE KODEKSA

Član 16.

Vijećnici će se uzajamno podsjećati i pozivati na obavezu poštivanja principa ponašanja utvrđenih ovim Kodeksom.

Predsjedavajući Vijeća će sa najvećom pažnjom pratiti ostvarivanje principa utvrđenih ovim Kodeksom i bit će ovlašten da upozori na obavezu ponašanja u skladu sa Kodeksom, kao i da preduzme i druge mjere skladu sa Poslovníkom o radu Vijeća.

Vijećnici će svojim aktivnostima podsticati održavanje otvorenih diskusija uz aktivno učešće građana na kojima bi iznosili svoja viđenja, pa i o poštovanju ovog Kodeksa ponašanja.

Član 17.

Vijećnik koji prekrši neku od odredbi ovog Kodeksa bit će podvrgnut utvrđivanju odgovornosti i izricanju sankcije a po postupku utvrđenom ovim Kodeksom.

Svrha ovog kažnjavanja je javna osuda neprihvatljivog ponašanja suprotnog ovom Kodeksu kao i moralni uticaj na buduće ponašanje vijećnika.

Član 18.

Sankcije za povredu neke od odredbi ovog Kodeksa su:

- ukor,
- javni ukor sa objavljivanjem izvještaja i odluke,
- novčana kazna.

Ukor se izvršava saopštenjem predsjedavajućeg Općinskog vijeća o izrečenoj mjeri i dostavom primjerka odluke izabranom zvaničniku kome je mjera izrečena.

Javni ukor se izvršava objavljivanjem odluke o javnom ukoru u «Službenim novinama Općine Doboj Istok» i na oglasnoj tabli općine.

Novčana kazna izriče se u visini do 30 % od mjesečne naknade koju izabrani zvaničnik prima obavljajući funkciju, a izvršava se obustavom od odgovarajuće naknade dostavljanjem odluke o sankciji službi za obračun.

O izrečenim sankcijama za povredu ovog Kodeksa evidenciju vodi Sekretar Općinskog vijeća.

Član 19.

Nadziranje primjene ovog Kodeksa obavljat će Komisija za pritužbe građana, ljudska prava, vjerske slobode i praćenje Kodeksa ponašanja izabranih zvaničnika - vijećnika, (u daljem tekstu: Komisija).

Član 20.

Svaki građanin i vijećnik ovlašteni su da podnesu prijavu povrede Kodeksa, a u prijavi će obavezno navesti ime i prezime podnosioca prijave, radnje za koje smatra da su povreda Kodeksa, član Kodeksa koji je prekršen i dokaze kojima to potvrđuje.

✗ Komisija ispituje osnovanost prijave, razmatra prijavu, provodi dokazni postupak i utvrđuje da li postoji povreda neke od odredbi ovog Kodeksa.

Ako Komisija utvrdi da nije bilo povrede Kodeksa, obavijestit će o tome podnosioca prijave, a Vijeće će o takvim slučajevima obavještavati svakih šest mjeseci.

U slučaju da Komisija utvrdi povredu ovog Kodeksa, za prvo naredno zasjedanje podnijet će Vijeću izvještaj sa preporukom o izricanju odredene sankcije.

O vrsti i visini kazne Vijeće odlučuje na osnovu preporuke Komisije, osim ako Vijećnik priloži relevantne dokaze o nepostojanju povrede odredbi Kodeksa, ili dokaze o povredi postupka utvrđenog Kodeksom.

VI - OBJAVLJIVANJE

Član 21.

Svojim aktivnostima vijećnici će obezbijediti promociju ovog Kodeksa u javnosti i medijima.

Član 22.

Stupanjem na snagu ovog Kodeksa prestaje da važi Kodeks koji je objavljen u „Službenim novinama općine Doboj Istok“ broj: 01/06.

Član 23.

Ovaj Kodeks stupa na snagu danom donošenja a objavit će se u «Službenim novinama Općine Doboj Istok»

BOSNA I HERCEGOVINA
 FEDERACIJA BOSNE I HERCEGOVINE
 TUZLANSKI KANTON
 OPĆINA DOBOJ ISTOK
 OPĆINSKO VIJEĆE

Broj : 02-05-2011/10
 Dana, 28.10.2010.godine



Na osnovu člana 15. Kodeksa ponašanja izabраних званичника – вијечника u Općinskom вијечу Doboj Istok («Službene novine Općine Doboj Istok», broj 6 /10) dajem sljedeću

I Z J A V U

Ja _____ iz _____
(ime i prezime)

viјечnik u Općinskom viјечу Doboj Istok obavezuјem se da ću se u cjelosti pridržavati Kodeksa ponašanja izabраних званичника – viјечника u Općinskom viјечу Doboj Istok («Službene novine Općine Doboj Istok», broj 6 /10).

Potvrđujem da mi je tekst Kodeksa predočen i da sam sa njegovim sadržajem upoznat.

Doboj Istok, dana _____ 2010. godine

(svoјeručan potpis viјечника)